




盛京通志

第二冊  
卷之一  
典謨  
勅諭序記  
典謨

ル 6  
437  
2



盛京通志卷之一

典謨

詔

世祖章皇帝登極恩詔

順治元年

奉

天承運

皇帝詔曰我國受

天眷佑肇造東土

烈祖邁圖鴻緒

皇考彌廓前猷遂舉舊邦誕膺

呂

門 487

卷之二

新命迨朕嗣服雖在冲齡締念紹庭永綏厥位頃緣賊氛  
洊熾極禡明朝是用託重親賢救民塗炭乃方馳金鼓  
旋奏澄清旣解倒懸非富天下而王公列辟文武羣臣  
暨軍民耆老合詞勸進懇切再三乃於今年十月初一  
日祇告

天

地

宗廟

社

稷卽皇帝位仍建有天下之號曰大清定鼎燕京紀元順治

緬維峻命不易勩業尤艱况當改革之初吏屬變遷之  
會爰乃酌今準古揆天時人事之宜庶幾吏習民安彰

祖功

宗德之人所有合行條例臚列如左

郊

天配

祖詔 順治五年

奉

天承運

皇帝詔曰大一統之業禮莫重於配

大通孝思之誠情莫切於尊

祖謹於順治五年十一月朔八日冬至恭祀

天於南郊奉

太祖承天廣運聖德神功肇紀立極仁孝武皇帝配饗卽於

是日推本

孝思追尊

高祖以上四世

高祖澤王爲

肇祖原皇帝

高祖妣爲原皇后

曾祖慶王爲

興祖直皇帝

曾祖妣爲直皇后

祖昌王爲

景祖翼皇帝

祖妣爲翼皇后

考福王爲

顯祖宣皇帝

妣爲宣皇后典禮綦隆覃恩宜廣特大赦天下以慰官民應

行事宜條列於後

奉

太祖

太宗配饗詔

順治十四年

奉

天承運

皇帝詔曰自古帝王禋祀天地必崇奉祖宗侑饗所以昭

功德申孝敬甚鉅典也恭惟

太祖武皇帝智勇懋昭肇開駿業

太宗文皇帝寬仁覃播繼廓鴻圖厚德豐功俱垂萬世並宜

配饗以盡尊崇朕仰承

天眷纘嗣

先猷南郊祈穀奉

太祖武皇帝配祀典禮已先舉行茲復昭告

天

地

宗廟

社

稷率諸王貝勒羣臣於順治十四年三月初六日如冬至

祈穀儀恭祀

上帝奉

太宗文皇帝同配於初九日如夏至儀恭祀

皇地祇奉

太祖武皇帝

太宗文皇帝並配式舉宏章宜頒湛惠

聖祖仁皇帝登極詔

順治十八年

奉

天承運

皇帝詔曰惟我國家受

天眷命

祖功

宗德造肇丕基我

皇考大行皇帝盛德至仁英資大度纘承歷數統一寰區恩

澤洽於多方政教臻於上理方期邦國永慶雍熙不幸

奄棄臣民遽升

龍馭顧以大寶屬於藐躬朕熒熒在疚本不忍聞而諸王貝

勒大臣文武官員人等僉謂神器既已攸歸天位不宜

久曠堅請再三朕是以俯徇輿志勉抑哀衷於是月初

九日祇告

天

地

宗廟

社

稷卽皇帝位仰惟

上天眷佑之篤

祖宗付託之隆涼德冲齡膺茲重寄敬圖觀光揚烈用紹無

疆之休其以明年為康熙元年與天下更始式衍舊恩

事洪新化所有合行事宜開列於後

聖祖仁皇帝親政詔

康熙七年

奉

天承運

皇帝詔曰朕以冲齡嗣登大寶輔政臣索尼蘇克薩哈遏

必隆鰲拜謹遵

皇考世祖章皇帝遺詔輔理政務殫心効力七年於茲今屢

次奏請朕承

太皇太后之命躬理萬幾深惟

天

地

祖宗付託甚重海內臣庶望治方殷朕以涼德夙夜祇懼天

下至大政務至繁非朕躬所能獨理宣力分猷仍惟輔

政臣諸王貝勒內外文武大小各官是賴務各殫忠盡

職潔已愛民任怨任勞不得辭避天下利弊必以上聞  
朝廷德意期於下究庶政舉民安早臻平治凡我軍民  
宜仰體朕心務本興行樂業安生以迓休寧之慶合行  
恩赦事宜條列於後

聖祖仁皇帝謁

福陵

昭陵詔 康熙十年

奉

天承運

皇帝詔曰朕惟自古帝王誕膺

天命撫育萬方皆由祖功宗德締造維艱俾後人克享成業

所以天下一統之後必展告成之禮甚鉅典也我

太祖高皇帝創建鴻圖肇興景運

太宗文皇帝布昭功德式廓丕基至

世祖章皇帝統一寰區大勲既集卽欲躬詣

山陵展祭告成未遑修舉朕纘承隆緒上託

祖宗洪庥天下底定仰體

皇考未竟之志恭詣

福陵

昭陵虔修祀事以告成功禮竣旋京湛恩宣布於戲繼述無



疆永著顯承之盛昇平胥慶益彰樂利之休布告天下  
咸使聞知

平定雲南詔 康熙二十年

奉

天承運

皇帝詔曰朕纘承丕緒統御寰區仰惟

天

地眷佑之庥

祖宗付託之重

聖祖母太皇太后慈訓之殷晝夜孜孜勤求化理期於兵革

寢息海寓乂安不意逆賊吳三桂負國深恩倡為變亂  
陰結奸黨同惡相援抗違詔令竊據疆土滇黔閩浙楚  
蜀關隴兩粵豫章之間所在驛騷肆騁痛毒三桂僭稱  
偽號逆焰彌滋負罪尤甚朕躬行天討分命六師勦撫  
並施德威互濟或繫頸於闕下或駢戮於師中擒捕誅  
鋤以次收服乃三桂既膺神殛逆孫世璠猶復鴟張踞  
六詔之一隅延殘喘以拒命朕惟賊患一日不除則民  
生一日不靖策勵將士屢趣師期於是虎旅協心進逼  
城下賊眾計窮勢蹙通欵軍門約日獻城兌渠授首師  
克之日市肆不擾邊境晏如捷書既至上慰

廟 郊

社

稷之靈下抒中外臣民之憤神人胥悅遐邇騰歡念自變亂以來軍民荼苦如在水火披堅執銳卒歲靡寧行齋居送千里相望被兵之地既羅於鋒刃供億之衆復困於征輸朕憫恤民艱不忍輒加額賦間施權宜之令用濟征繕之需意在除殘事非獲已而身處宮寢之內屢懷閭閻之依中夜屢興盱食不暇怒焉思治八載於茲今羣逆削平疆圉底定悉剪歷年之蠹賊永消異日之

隱憂思是蕩滌煩苛維新庶政大沛寬和之澤冀臻熙皞之風所有事宜開列於後

下雲南上嶽號詔 康熙二十年

奉

天承運

皇帝詔曰朕惟帝王纘承鴻緒首重尊親顯號薦加彝章具在矧式遏禍亂者定朕功實稟誨育之恩應極尊崇之典比者逆賊吳三桂反叛煽動多方朕夙夜靡寧肆張天討仰承

聖祖母昭聖慈壽恭簡安懿章慶敦惠溫莊康和仁宣太皇

太后

聖母仁憲恪順誠惠純淑皇太后懿訓次第剪滅克奏蕩平

上慰

宗廟之靈下拯生民之厄非藉

慈庇曷克臻茲用晉休稱載揚

盛德謹告

天

地

宗廟

社

稷於康熙二十年十二月二十四日率諸王貝勒文武羣

臣恭奉

冊寶加上

聖祖母昭聖慈壽恭簡安懿章慶敦惠溫莊康和仁宣太皇

太后徽號曰

昭聖慈壽恭簡安懿章慶敦惠溫莊康和仁宣弘靖太皇太

后

聖母仁憲恪順誠惠純淑皇太后徽號曰

仁憲恪順誠惠純淑端禧皇太后禮既備於

兩宮澤宜敷於四海所有應行事宜開列於後

噶爾丹詔 康熙三十六年

奉

天承運

皇帝詔曰朕君臨天下早夜孜孜勤求治理惟恐一夫不獲其所初未嘗有岐視中外輕事兵戎遠伐異域之事厄魯特噶爾丹向與七旗喀爾喀同奉職貢嗣因兩國交鄰構兵喀爾喀汗等爲所敗叩關內附噶爾丹乃借辭追擊闖入我邊境恣行狂逞朕屢頒敕諭令其悔罪自新而狡寇不知省悟益肆鴟張其逆謀巨澍實有偏處近塞窺伺中原之漸朕思此寇包藏禍心倘不卽行撲滅則異日必緣邊設防重滋民困何如及時聲討立靖根株於是昭告

天 地

宗社躬統禁旅不憚勤勞三出塞外去年夏賊踞克魯倫河自度力不能抗倉皇宵遁朕親追至土喇河適西路大兵遮截其後擊敗之於昭木多賊勢大挫冬月復駐蹕鄂爾多斯收撫其降衆遏絕其外援而賊益困蹙機會所在刻不可失遂以今年春西撫邊境從寧夏出塞遣發大兵兩路進勦而西海烏思藏人等皆先後輸忱自

劾哈密國人又俘獻噶爾丹之子於行在噶爾丹窮迫已極一聞大軍壓境計無復之隨於阿察阿穆塔台地方飲藥自盡揆諸料敵成謀適相符合自此寇氛盡滌邊圉永安而朕爲民除害不得已而用兵之意亦可曉然共喻於天下臣民矣武功告成之日正太和殿鼎建工竣巍煥方新臨御伊始協氣集於九重觀瞻肅於萬國是用覃敷慶澤以上答

廟 郊

社

稷之靈下愜中外人心之望於戲懋武功而敷文德聿臻熙皞之風建宸極而鞏皇圖永慶平成之治誕告中外

咸使聞知

世宗憲皇帝御極詔

康熙六十一年

奉

天承運

皇帝詔曰朕惟我國家受

天綏祐

太祖

太宗肇造區夏

世祖章皇帝統一疆宇我

皇考大行皇帝臨御六十一年德茂功高文經武緯海宇寧

謐歷數悠長不謂謝棄臣民遽升

龍馭親授神器屬於藐躬朕

皇考大行皇帝

德妃之子昔皇二子弱齡建立深為

聖慈鍾愛寢處時依恩勤倍篤不幸中年神志昏憤病類風

狂

皇考念

宗社重任付託為艱不得已再行廢斥待至十有餘年沉疾

如故痊可無期是以

皇考升遐之日

詔朕繼承大統朕之昆弟子姪甚多惟思一體相關敦睦罔

替共享昇平之福永圖磐石之安孔子曰三年無改於

父之道我

皇考臨御以來良法美政萬世昭垂朕當永遵成憲不敢少

有更張何止三年無改至於

皇考知人善任至明至當內外諸大臣朕方亟資翊贊以期

終始保全務宜竭盡公忠恪守廉節俾朕得以加恩故

舊克成孝思倘或不守官箴自干國紀既負

盛京通志 卷之一  
皇考簡拔委任之恩及負朕篤愛大臣之誼部院屬吏直省  
有司亦宜實心任事潔已奉公不得推諉上官自曠厥  
職天下百姓受

皇考恩澤日久蠲賑頻施勸懲備至間有愚氓甘犯律令  
皇考每遇讞決必加詳審爰書累牘披閱靡遺少有可生之  
路立施法外之仁凡我百姓各宜孝親敬長畏罪懷刑  
以副朕仰法

皇考如天好生之意茲因諸王貝勒大臣文武官員人等會  
謂天位不可久虛

宰社元宜早主再三陳請朕勉狗輿情暫抑悲痛於是月二  
十日祇告

天

地

宗廟

社

稷卽皇帝位以明年爲雍正元年仰惟  
先志之宜承深望

皇圖之永固適昭新化期衍舊恩於戲追慕  
前徽繼述無忘於夙夜廣推

聖澤恩膏願被於寰區凡爾親賢文武其共矢盡誠各輸心

晉用紹無疆之業永垂有道之庥布告天下咸使聞知

今上御極詔 雍正十三年

奉

天承運

皇帝詔曰惟我國家受

天眷命

太祖

太宗創垂基緒

世祖統一萬邦

皇祖聖祖仁皇帝享祚久長重熙累洽我

皇考大行皇帝紹承大統御宇十有三年夙夜憂勞勤求至

治用康乂我億兆臣民盛德豐功炳耀寰宇恩膏洋溢

漸被八紘薄海時雍中外蒙福方期永綏隆祚仰荷鴻

禧何意奄棄臣黎遽升

龍馭以

宗廟

社

稷之重屬於藐躬朕自冲齡卽蒙

皇祖撫育宮中深恩鍾愛睠昧逾常

皇考顧復恩勤聖慈篤摯瞻依朝夕祇受



誨言臚迪有加

宸衷默眷朕自惟涼德懼弗克勝顧念神器不可久虛勉抑

哀哀欽遵

成命於九月初三日祭告

天

地

宗廟

社

稷卽皇帝位以明年為乾隆元年仰惟

上天篤佑之隆

皇考貽謀之重撫躬乾惕祇紹

前徽丕布新恩聿昭錫類於戲覲光揚烈深思負荷之維艱

建極綏猷時勵精勤於罔懈諸王文武大小臣工其共

殫公忠協心襄贊懋圖上理祇迓洪庥以廣大我國家

無疆之祚布告天下咸使聞知

盛京通志卷之一

盛京通志卷之二

典謨

勅諭

康熙十八年

聖諭十六條

敦孝弟以重人倫篤宗族以昭雍睦和鄉黨以息爭訟  
 重農桑以足衣食尙節儉以惜財用隆學校以端士習  
 黜異端以崇正學講法律以儆愚頑明禮讓以厚風俗  
 務本業以定民志訓子弟以禁非爲息誣告以全善良  
 誠匿逃以免株連完錢糧以省催科聯保甲以弭盜賊

解讐忿以重身命

康熙二十一年三月初五日

諭裕親王福全

相別以來忽復兼旬棣萼之思時在寤寐初四日已抵盛京山川形勢風土民情深維

祖宗開創之艱難令人遠想慨然春氣漸佳知意興甚適也特此佈問不宣

康熙二十一年三月初八日

諭蘇大敦柱

茲上

太皇太后奏啟爲切陳微衷仰祈

睿鑒事內云自山海關至盛京水土皆佳獸多魚鮮每當食頃輒念不能馳奉

太皇太后甚歉於懷到盛京後身親網獲鯉魚鱖魚設法成段浸以羊脂者一種鹽醃者一種星馳遞送心期兩件奉到之日倘得味仍鮮美庶可稍見微誠山中野燒自落榛實及山核桃朝鮮所進柿餅松子白果栗子附候安奏啟同往等語所進之物可同奏啟一併送至

慈寧宮其銀餅中所貯之魚到日鮮否明白奏知若

太皇太后欲寄製成棗脯卽實之餅中封固付來爲此特諭

康熙二十一年三月初八日

諭戶刑二部

朕承

祖宗丕緒撫御區宇日以子育元元為念自逆賊吳三桂倡亂滇南多方煽動軍興八載中外驛騷仰賴

祖宗在天之靈默垂眷佑殄滅兇渠民生乂安疆圉底定爰特行徧祀

山陵之禮用告成功茲恭詣

福陵

昭陵謁祭禮竣惟盛京為國家肇基重地朕躬親幸宜沛大

澤以示殊恩山海關以外及寧古塔等處地方官吏軍民人等除十惡等真正死罪不赦外其餘已結未結一切死罪俱着減等發落軍流徒杖等犯悉准赦免奉天錦州二府屬康熙二十一年地丁正項錢糧著通行蠲豁其官役墊補包賠等項應追銀兩察果家產盡絕亦并豁免用稱朕加惠根本優恤黎民至意特諭

康熙二十一年四月二十三日

諭敦柱蘇大

朕至渾河太子河遼河三河合流之處地名牛莊河水泛漲乘舟渡河扈從諸人以次待渡因暇舉網所得鱧

魚五尾鳥子魚六尾鯉魚四尾鱗魚四尾鰻魚三十二尾鴨嘴魚六尾重唇魚二尾中魚三尾杆條魚一尾共六十三尾欲遣人齎往恐日久味變故著驛遞馳送爾二人將魚進

太皇太后兼奏明此意有何

慈諭併此魚到去新鮮與否於隨常奏啟內詳細奏來爲此

特諭

康熙二十一年五月初九日

諭刑部

頃以逆賊殲滅海宇蕩平朕躬詣盛京展謁

永陵

福陵

昭陵以告成功因而巡行邊塞咨詢民間疾苦東至烏喇地方見其風氣嚴寒由內地發遣安插人犯水土不習難以資生念此輩雖干憲典但旣經免死原欲令其生全若仍投畀窮荒終歸踣斃殊非法外寬宥之初念朕心深爲不忍以後免死減等人犯俱著發往尚陽堡安插其應發尚陽堡人犯改發遼陽安插至於反叛案內應流人犯仍發烏喇地方令其當差不必與新披甲之人爲奴以昭朕軫恤民隱哀矜保全之意爾部卽遵諭行

特諭

康熙二十一年五月初十日

諭戶兵工三部

從前盛京看守

陵寢及山海關等城守章京員缺俱令其子弟頂補後停止此例悉由京師補授頃朕以昭告成功展謁

永陵

福陵

昭陵因周視所歷地方見道里遼遠往返艱難若章京員缺盡從京師補授則家口遷移重爲貧窶者之累且將前

任章京房屋田地掣給新補之員以致前官孤孀無倚不能回京如欲卽留彼地則田廬旣空資生何策困苦日甚深用憫然嗣後盛京看守

陵寢及山海關等處城守章京員缺不必自京補授著於伊等子弟內令該將軍選擇賢能者具題引見頂補以免其往返遷移之苦倘伊等子弟無人堪用別有補授發往之員可另撥田房給與其前任章京田房仍行留給不必掣出令其孤孀得所爾三部會同詳議具奏特諭

康熙二十一年五月十九日

諭將軍巴海副都統薩布蘇瓦里虎等

朕幸吉林地方訪詢民隱見兵丁役重差繁勞苦至極此等情由回鑾之日將軍以下至於兵丁教諭大意已有特旨朕自至京師復爲思繹不將各種無益差徭顯與革除兵丁人等終無裨補且不得需實惠矣一鷹鷂窩雛於三月尋覓四月內捕取最妨農事兼屬無益況所得鷹鷂不諳呼飼難至京師徒勞人力應行停止一自八月放鷹原欲令之熟習以便齎送數年以來並無名鷹貢至京師在烏喇地方兵丁於冬寒之時尋覓山鷄人馬勞頓應行停止一圍獵以講武事必不可廢亦不可無時冬月行大圍臘底行年圍春夏則看馬之肥

瘠酌量行圍令貧人採取禽獸皮肉須預先傳朔日期以便遵行所獲禽獸均行分給圍獵不整肅者照例懲治不可時加責罰苛求瑣屑遇有猛獸須小心防禦以人爲重勿致悞有所傷一打鱒鯉等魚既有專管西特庫等烏喇兵丁應停差役其搬移新滿洲採取造房並船隻桅木等項及偵探巡邏等差俱係軍務乃駐防官兵專責不可寬假應照常行此外偶爾差遣大臣侍衛督看採取東珠砍伐木植尋覓鷹鷂不涉每歲定例所行之事似無過勞此後將軍以下撥什庫以上應念兵丁遠居邊境無市貿易身冒嚴寒往採山木妻子汲水

操作備極艱辛時加憐憫吉林烏喇田地米糧甚爲緊要農事有悞關係非細宜勸勉之使勤耕種朕軫念滿洲人民生理欲遣人專往以驛遞疲弊故因筆帖式來奏特諭

康熙二十三年十二月十六日

諭大學士勒德洪明珠

爾等可傳諭議政王貝勒大臣征戰本非佳事不得已而後用之嚮者俄羅斯無故侵擾我邊陲後復漸入越我疆界索倫黑真費雅喀奇勒爾等處之人皆被擾害不獲寧居掠其家口納其逋逃搶其邨落奪其貂皮因

彼頻年肆害曾屢行曉諭曰爾等無故入我邊境恣行搶奪朕何難遣發大兵將爾等撲滅但不忍即行殄戮故屢行曉諭欲令撤還爾衆歸我逋逃各居疆上互相貿易寧靜無事以安生業數次遣人亦於來使處屢有文移俄羅斯總無一次回報反於黑真費雅喀之地仍行搶奪用是發兵於愛渾地方以堵截俄羅斯所行之路乃俄羅斯仍居我邊界不歸我逋逃今雖應行剿滅但念用兵本非佳事我惟順天而行將大兵前臨雅克薩以朕諭旨遣人宣布俄羅斯諭之曰屢次令爾退回歸我逋逃之人遣使馳書者數矣數年以來未有一次



信息回報既不歸我逋逃反入我境內擾害地方搶掠人民妻子肆行不止爲此遣發大兵前往堵截爾等所行之路於恒滾等處之俄羅斯許其歸順待以不死而生養之汝等仍不退離雅克薩地方故遣發大兵往行征討我師威力豈難剿撲爾等若卽破壞爾城郭殄滅爾噍類自立成灰燼矣豈惟爾等俄羅斯普天之下率土之人朕皆惻然仁愛咸欲令其靜寧無事各遂休養故不忍將爾等遽行殄滅屢次曉諭爾等欲各安生業共享太平則當卽返雅庫地方以雅庫爲界於彼處捕取貂皮於彼土收其物產勿入我邊界恣意妄行汝能

將已納之逋逃歸還則降我之俄羅斯亦發還於汝如此則邊塞貿易可通咸安樂利而兵革偃息生民無所擾害矣若執迷不悟罔遵諭旨仍行抗拒則大兵進剿摧破雅克薩之城且盡行誅戮矣可遣人前往明白開示俄羅斯果能遵旨卽回以雅庫爲界而我兵駐劄愛渾則於雅克薩地方安置哨兵令疆界寧謐儻仍行抗拒則大兵相機而行若不如是周詳區畫今雖取雅克薩我兵進則俄羅斯退我兵還則俄羅斯又進用兵無止息之日而生民亦不獲安矣應否如此議政王貝勒大臣會議具奏

康熙二十四年正月二十七日

諭大學士勒德洪明珠尚書科爾坤侍郎鄂爾多郭不黑龍江兵食所關最爲重要必當謀恒足之道爾等與議政王貝勒大臣會同詳議以聞又遣往黑龍江管轄綠旗兵丁之官甚多兵少而管轄之官多甚無益也可度量派官而兵更宜酌減以四百名爲率亦旣足用而兵糧不致過費且近冬之際綠旗兵在彼地殊無所事可由蒙古境每名分爲一隊俾遞送之旣非久可至而兵糧又不至糜費矣其一併詳議以聞

康熙二十四年正月二十七日

諭大學士勒德洪尚書科爾坤哈占侍郎鄂爾多

科爾沁十旗今歲進貢牛羊乳酒酥油諸物皆毋貢至京師悉送之黑龍江以給軍士籍其數奏聞仍以進貢例賞賚之如此似於兵丁有益議政王貝勒大臣會議以聞

康熙二十四年六月十四日

諭大學士勒德洪學士麻爾圖圖納

俄羅斯闖入我邊塞擾害俄羅春索倫黑真費雅喀等處人民搶掠其家口雖屢肆兇暴朕不忍遽興兵革故未卽遣發大兵征討數遣使曉諭俄羅斯恃其遼遠仍

復抗拒益侵犯我邊鄙之人肆虐不止用是遣大兵直抵雅克薩之城彼因困迫已甚而後歸降爰遵朕命宥其困而後降之罪釋之使還大兵迅速征行破四十年盤踞之俄羅斯於數日之間獲雅克薩之城克奏厥績薩布蘇向來逗留不進兵之罪應槩從寬免又雅齊納鄂山本獲罪發遣之人其所互告之事仍行察議令進剿官兵殊屬勞苦令伊等暫回烏喇幾林地方於盛京達呼里之兵酌量派往防守至於雅克薩城雖已克取防禦決不可疎應於何地永駐官兵彈壓此時卽堂定議著大學士勒德洪學士麻爾圖圖納同郎談關保與

議政王貝勒大臣會議具奏

康熙二十五年十二月初六日

諭大學士勒德洪明珠學士禪布噶思泰吳喇岱齊稽吳  
典祖額爾赫圖

日者遣部員自幾林烏喇至黑龍江以蒙古席白達呼里索倫等人力耕種田穀大獲夫民食所關至重來歲仍遣前種田官員以蒙古席白達呼里索倫等人力耕種郎中博奇所監種田地較諸處收穫爲多足供驛站人役之口糧又積貯其餘穀博奇効力視衆爲優其註之冊此遣去諸員可互易其地監視耕種博奇又復大

獲則議敘焉

康熙二十六年十月二十四日

諭尚書鄂爾圖郎中伊爾克圖溫保

黑龍江至爲要地兵丁勞苦朕罔不知曩者俄羅斯漸次入犯占踞我達呼里索倫等處擾害邊疆四十一年無如之何後備足軍食永戍黑龍江以困逼之俄羅斯遂窘迫至極乃屢次求和今彼之使臣已來尚未曾至苟糧儲不足則如沙爾瑚達塔海等之往征而不能成功矣此事未經年遠朕親所聞知且亦衆所共悉也朕所委曲區畫自盛京等處轉輸糧食及令所種米穀積

貯自裕彼地大臣官員皆不思搏節濫給於無用之人苟且草率希圖軍儲罄盡勢必將彼等撤回彼等誠能以身家性命力保俄羅斯斷不來犯朕自撤回之也我之官兵撤回俄羅斯大衆難以齊來彼地將軍官員固皆稔知然或一二人或十餘人陸續聚集於黑龍江松花江之間構造木城盤踞其地則我取之維艱是俄羅斯爲主兵而我反爲客兵也今我惟多貯糧食永戍官兵則我兵得逸而俄羅斯兵爲勞矣如此則俄羅斯零星來犯斷所不能欲大隊侵入則彼糧食何能挽運耶若黑龍江我兵不行永戍自松花江黑龍江以外所居

民人皆非吾所有矣爾等皆係選擇差遣往至彼處殫心竭慮務期爲久遠充裕之計詳加籌議惟此一舉也亦無事再遣矣

康熙三十年二月十八日

諭大學士伊桑阿阿蘭泰學士邁圖西安南塔海傅繼祖盛京官屯五十所沿邊丁壯設爲屯二十五所遷移於烏喇念此莊屯及沿邊丁壯居住年久已成聚落今遽令遷移如此衆多人戶生業蕩然必致苦累仍留於盛京與遷移於烏喇皆公家之屯其爲納賦則一也朕意此莊中應停其遷徙於烏喇兵丁每歲派三百名耕種

或一歲以烏喇之兵一歲以捕牲之人輪年耕種亦可以積穀矣此事所關綦重著學士麻爾圖馳驛往盛京烏喇令將軍副都統各部堂官悉喻朕意伊等之意若何詳議回奏

康熙三十年六月十六日

諭大學士伊桑阿阿蘭泰學士邁圖西安博極傅繼祖王國昌年遐齡

黑龍江松花江接壤之地彼處附近所居根奇勒諸姓中原有可披甲之人應酌量令其披甲駐防遣滿洲兵八十人往彼教訓之齊七喀爾地方以索倫達呼里之

衆酌量令其披甲駐防遣滿洲兵二百人往彼教訓之  
伊等居址附近亦心樂披甲如此則既無遠徙之苦亦  
不致需用糗糧矣可以此詢問都統巴海令理藩院集  
議政諸臣會議以聞

康熙三十二年

諭戶部

今歲盛京穀石失收糧價甚貴來年春夏恐糧價更貴  
必致窘迫亦未可定運糧之處亦著預議自盛京錦州  
乘海舩往山東水路甚近今歲山東地方年成豐熟俟  
來年冰解著盛京戶部侍郎親身由海前往山東會同  
山東巡撫將附近地方米石多多發出由海運至三岔  
河販賣與無糧之人

康熙三十三年七月十六日

諭戶部

盛京等處去歲禾稼不登粒食艱窘聞今年收穫亦未  
豐稔米穀仍貴儻價值日漸翔涌則兵民生計恐致匱  
乏盛京等處地方關係緊要朕心時切軫念宜豫加籌  
畫作何恩給俾各資生著遣部院堂上官一員前在自  
甲兵以及匠役當差人等有力不能餬口者將人戶數  
目察明造冊具奏爾部卽遵諭行特諭

康熙三十四年五月二十九日

諭大學士伊桑阿侍郎朱都納學士宋柱戶部郎中鄂奇副都統齊蘭布等自盛京還奏言今歲盛京亢旱麥禾不成米價翔貴雖市有鬻粟而窮兵力不能糶遂致重困夫盛京者根本之地令朱都納宋柱鄂奇等馳驛迅往會同盛京將軍副都統諸臣詳察果窮乏者於去歲海運米二萬石中動支一萬石計會散給令可食至秋成此一萬石散給而有餘者平價糶之若此則兵民均有益又諸地有告糧乏者遣城守尉部員之賢能者併散給以賑之如一萬石不足散給發糶速具聞請旨

康熙三十四年八月初三日

論戶部

盛京地方比歲荒歉粒食艱難朕心深切軫念原欲躬親巡省詢問疾苦情形徧敷恩澤今雖停止東行而所在貧窶兵丁尚冀朕之臨幸是宜仍加賑卹用俾資生應作何加恩爾部議奏又盛京兵丁錢糧兩季支領兵丁於未支領之際每致有稱貸逋負嗣後著按月支給至今歲秋禾開亦不甚豐茂恐生計漸艱困乏滋甚自今冬以至來秋應作何賑給不致失所共計需糧若干著盛京將軍副都統會同盛京戶部侍郎查明詳加籌

書具奏爾部卽遵諭行特諭

康熙四十九年

諭戶部

朕躬膺

天眷祇承

列祖鴻庥統御萬方子育兆庶厯懷至治宵旰靡寧幸際海宇同風邊隅嚮化遐邇中外帖然衽席之安者是皆仰荷

天

地

祖宗福祐之所致也方朕八齡歲祚之初

太皇太后問朕何欲朕對臣無他欲惟願天下治安生民樂業共享太平之福而已迄今五十年矣倦倦此心未嘗一日少釋每思民為邦本勤恤為先政在養民蠲租為急數十年以來除水旱災傷例應豁免外其直省錢糧次第通蠲一年者屢經舉行更有一年蠲及數省一省連蠲數年者前後蠲除之數據戶部奏稱通共會計已逾萬萬朕一無所顧惜百姓足君孰與不足朝廷恩澤不施及於百姓將安施乎朕每歲供御所需槩從儉約各項奏銷浮冒亦漸次清釐外無師旅饟饋之煩內無



土役興作之費因以歷年節省之儲蓄爲頻歲渙解之恩膏朕之蠲免屢行而無國計不足之慮亦恃此經畫之有素也比來省方時邁已歷七省南北人民風俗及日用生計靡不周知而民生所以未盡殷阜者良由承平旣久戶口日蕃地不加增產不加益食用不給理有必然朕洞矚此隱時深軫念爰不靳敷仁用甦民力明年爲康熙五十年思再沛大恩以及吾民原欲將天下錢糧一槩蠲免因衆大臣集議恐各處需用兵餉撥解之際兵民騾遞益致煩苦細加籌畫悉以奏聞故自明年始於三年以內通免一週俾遠近均霑德澤直隸奉

天浙江福建廣東廣西四川雲南貴州各巡撫及府尹所屬除漕項錢糧外康熙五十年應徵地畝銀共七百二十二萬六千一百兩有奇應徵人丁銀共一百一十五萬一十兩有奇俱著察明全免並歷年舊欠共一百一十八萬五千四百兩有奇亦俱著免徵其五十一年五十二年應蠲省分至期候旨行民間舊欠旣經豁免嗣後每年額徵錢糧務如數全完倘完不及額或別有虧空託稱民欠則負國甚矣卽責令督撫以下官員償補仍從重治罪夫地方大吏以及監司守令皆與吾民誼均休戚者也誠克體朕孳孳保赤之懷實心愛養力

杜侵牟賸削則閭閻咸得衣食滋殖無有失所而為官吏者亦身名俱泰豈非昇平樂利之盛事歟爾部移文各督撫諭旨到日卽刊刻頒布徧示窮簷令咸知悉特諭

雍正元年

諭老農

朕惟四民以士為首農次之工商其下也漢有力田孝弟之科而市井子孫不得仕宦重農抑末之意庶為近古士子讀書砥行學成世用國家榮之以爵祿而農民勤勞作苦手胼足胝以供租賦養父母育妻子其敦龐

淳朴之行豈惟工賈不逮亦非不肖士人之所能及雖榮寵非其所慕而獎賞要當有加其令州縣有司擇老農之勤勞儉朴身無過舉者歲舉一人給以八品頂帶榮身以示鼓勵

奉天府屬州縣每歲照例舉行七年奉文三歲一舉老農

雍正元年

諭州縣

朕惟國家首重吏治爾州牧縣令乃親民之官吏治之始基也貢賦獄訟爾實司之品秩雖卑職任綦重州縣官賢則民受其利州縣官不肖則民先受其害膺茲任者當體朝廷惠養元元之意以愛民為先務周察部屋

綏輯鄉里治行果有其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民爲邦本本固邦寧夫所以固邦本者在吏治而吏治之本在州縣苟州縣之品行不端猶基不立則室不固庸有濟乎

皇考

臨御六十一年灼知州縣之重特行引見咨詢明試至詳至慎其有廉能之員每不次超擢以示鼓勵今海內羣黎皆

皇考

所懷保也朕膺

宗社重寄思繼

皇考

之治功惟爾州縣諸臣具有父母斯民之責其爲朕立之基址以固邦本焉誠能潔已奉公實心盡職一州一縣之中興仁興讓教孝教忠物阜民安刑清訟簡朕將升之朝宁用作股肱如或罔念民瘼恣意貪婪或股削肥家或濫刑逞虐或借刻以爲清或恃才而多事或諂媚上司以貪位或任縱胥吏以擾民或徇私逞欲以上虧國帑王章具在豈爾貸歟更有任州縣時私肥已橐而漫云且俟顯要方立名節者其與初市清名晚而改操之人何以異哉至於錢糧關係尤重絲毫顆粒皆百姓之脂膏增一分則民受一分之累減一分則民沾一

分之澤前有請暫加火耗抵補虧空帑項者

皇考

示諭在廷不允其請爾諸臣共聞之矣今州縣火耗任意加增視為成例民何以堪乎嗣後斷宜禁止或被上司察核或被科道糾參必從重治罪決不寬貸夫欲清虧空之源莫如節儉正直節儉則用無不足正直則上官不可干以私若股小民之生以飽上官之貪欲冒不測之罪以快一時之奢侈豈砥礪廉隅為民父母之道乎爾州縣等官其恪共乃職勿貽罪戾毋謂地遠官卑不及察其賢否也特諭

雍正元年

諭知府

國家親民之官莫先於守令蓋州縣官與民最親而知府又與州縣官最親況州縣興利除弊之事皆於知府有專責焉是知府一官分寄督撫監司之耳目而為州牧縣令之表率承流於上宣化於下所繫綦重矣漢宣帝有曰太守吏民之本也又曰庶民所以安其田里而無歎息愁恨之心者政平訟理也與我共此者其惟良二千石乎故兩漢循良稱盛而賢守尤多龔黃召杜諸人大都皆廉潔和平正身率屬以與民休養生息史稱其所居民富所去民思此皆彰明較著者也

皇考澄肅官方慎簡僚吏知府中有政績茂異聲名著聞者必加優眷數年之間卽膺殊擢所以鼓勵循良務令羣黎受福爾等蒙

皇考簡任之恩受國家民社之寄地方不甚遼遠則於民間之疾若可以周知勢分不甚懸殊則於屬下之賢否可以洞悉爾果廉正自持屏絕賄賂則督撫監司必不致肆行需索而州牧縣令亦不敢恣意貪婪近聞州縣火耗任意加增罔知顧忌以小民之脂膏飽貪吏之豁豁由爾不能却遺金於暮夜又安能禁屬吏之濫征乎然查倉庫必須覈實不可視爲故事乃或借盤查之名勒索餽遺是因盤查而虧空愈甚矣爾能時勤勸誡加以體恤則州縣可無虧空之虞能制節謹度淡泊是安則爾亦可免虧空之累勸農課桑以厚風俗禁強戢暴以安善良平情聽斷以清獄訟皆爾職守之所當盡者至於督撫舉劾州縣必由爾之詳揭務須秉公持正勿涉偏私若善於逢迎者從而庇護薦拔之而端方恬靜之人反故爲摧抑下吏皆苟且營私以求容悅地方之事尚可問乎居官者每有初入仕途清操自矢漸登華要頓改初心旣知砥礪廉隅卽當始終一節更有巧於仕宦者人每謂其名實兼收朕最不解此語夫名者實之

實者人每謂其名實兼收朕最不解此語夫名者實之

華果能潔已愛民奉公盡職此所謂實也治行稱首民歌輿頌此所謂名也實至而名隨之如本立而華茂焉若以弋取虛譽為名而以封殖多藏為實此則小人之尤更甚於貪黷彰聞之輩矣朕纘承大統夙夜祇懼惟恐有負

皇考付託之重深冀爾等各體此意精白乃心以古循良自勉若徇私納賄不能率屬愛民貽害地方蔑視憲典三尺具在朕不能為爾等寬也特諭

雍正元年

諭督學

朕惟自古帝王皆以興賢育才為務我國朝自

太祖

太宗肇造鴻圖

世祖定鼎中夏首隆學校加意人才開國規模超越前古至我

皇考

聖祖仁皇帝御極六十一年培養教育恬冒涵濡深仁厚澤有加無已

御製訓飭士子文頒布學宮東西南朔海澨山陬戶習詩書家敦禮樂遐邇無不嚮風文教之隆莫過於此矣朕纘

承大統遵守舊章寤寐求賢惟恐或失念學校爲士子  
進身之階督學一官尤人倫風化所繫遴選各省學臣  
倍加鄭重爾等須廉節持身精勤集事實行文風兩者  
所當並重若徒事文華而不敦崇實行猶未爲盡職也  
表揚忠孝節義崇祀先聖先賢訪求山林隱逸搜羅名  
蹟藏書而衡文一道專以理明學正典雅醇潔爲主古  
人云言乃心聲氣由風養必士品端而後文風正他日  
爲國家柱石爲朝廟羽儀不綦重歟勿私納苞苴勿瞻  
徇情而勿輕視武途勿濫取祠蔭勿矯激沽名勿昏庸  
廢事勿卑汙貶節勿驕暴凌人胥吏必謹關防幕客尤  
宜避擇如此則內外交悉本末兼修上不負朝廷下不  
愧多士朕耳目所及必有見聞若罔顧聲名廉隅不飭  
國有常憲罰必隨之尚其勉旃勿忽特諭

雍正四年

諭教士子責成學臣教職

爲士者四民之首一方之望凡屬編氓皆尊之奉之以  
爲讀聖賢之書列膠庠之選其所言所行俱可爲鄉人  
法則也故必敦品勵學謹言慎行不愧端人正士然後  
以聖賢詩書之道開示愚民則民必聽從其言服習其  
教相率而歸於謹厚或小民偶有不善之事卽懷愧恥

之心相戒勿令某人知之如古人之往事則民風何患  
不淳世道何患不復古耶朕觀今日之士子雖不乏閉  
門勤修讀書立品之輩而蕩檢踰閑不顧名節者亦復  
不少或出入官署包攬詞訟或武斷鄉曲欺壓平民或  
違抗錢糧藐視國法或代民納課私潤身家種種卑劣  
下賤之事難以悉數彼爲民者見士子誦讀聖賢之書  
而行止尚且如此則必薄待讀書之人而並輕視聖賢  
之書矣士習不端民風何由而正其間關係極爲重大  
朕自卽位以來加恩學校培養人材所以教育士子者  
無所不至宜乎天下之士皆鼓舞奮興爭自濯磨盡去

其佻達之習矣而內外諸臣條奏中臚列諸生之劣跡  
請行嚴懲者甚多朕思轉移化導之法當先端其本源  
教官者多士之儀型也學臣者教官之表率也教官多  
屬中材又或年齒衰邁貪位竊祿與士子爲朋儔視考  
課爲故套而學臣又但以衡文爲事任教官之因循怠  
惰苟且塞責漫不加察所以倡率之本不立無怪乎士  
習之不端而風俗之未淳也朕孜孜圖治欲四海之大  
萬民之衆皆嚮風而慕義革薄而從忠故特簡督學之  
臣慎重學臣之職欲使自上而下端本澄源以收實效  
也凡爲學臣者務使持公秉正宣揚風化於教官之稱



職者卽加薦拔溺職者卽行叅革爲教官者誦誨士子  
悉秉誠心如父兄之督課子弟至於分別優劣則至公  
至當不涉偏私如此各盡其道則士子人人崇尚品詣  
砥礪廉隅且不但自淑其身而羣黎百姓日聞善言日  
觀善行以生其感發之念風俗之丕變庶幾其可望也  
特論

雍正五年

論學政保舉生員

國家設學校以諸養人材鄉會廷試拔其尤者而用之  
卽古選士造士之遺意也但士子作文有一日之長短

縱使主司公明搜羅豈能無遺況去取惟憑文藝其人  
品之高下才能之優絀無由得知每有出羣拔萃之才  
屢試不第卽或晚得一第而年力衰邁不堪爲國家任  
用朕思各省學政奉命課士黜劣舉優係其專責嗣後  
學政三年任滿將生員中實在人品端方有猷有爲有  
守之士大省舉四五人小省二三人送部引見朕親加  
考試酌量擢用現在報滿各學政卽遵照薦舉其到任  
未久者如有所知亦卽舉出夫一省而舉數士不可謂  
無人學政巡歷各府三年之久日與士子相親考文察  
行不得謂不知但能虛公衡鑑所舉必得其人且風聲

盛京通志 卷之二  
所樹凡讀書士子必皆鼓舞振興力學敦行求爲有用之儒於士習人才大有裨益該學政其各實心奉行毋得苟且塞責如有徇私冒濫等弊必嚴加治罪特諭  
雍正五年

諭耕藉

自雍正二年以來朕躬耕藉田而藉田之中每歲必產嘉穀上年自雙穗至於九穗今歲則自雙穗至於十三穗在廷諸臣及京都耆庶皆驚訝以爲奇朕之宣示於衆者並非矜詡誇張以爲祥瑞蓋實有見於天人感召之理捷於影響而朕敬

天之心至誠至切願與內外大小臣工共勉之也稼穡爲天地之寶實生民之命攸關我

聖祖仁皇帝臨御六十餘年無刻不以重農力穡爲先務仰觀天時俯察地理辨土性而課人工資雨暘而防旱潦旰食宵衣偶遇雨澤愆期

聖心憂勞之切侍側臣子皆惶悚不寧所以爲萬民謀粒食者至矣盡矣朕瞻仰日覩者四十餘年今纘承大統竭誠效法念切民依每歲虔祀

先農躬耕帝藉仰蒙

上天眷祐叠錫嘉禾信而可徵纖毫不爽是以特頒諭旨令

各省守土官共舉耕藉之禮爲萬方百姓祈禱秋成今見各省督撫奏報前來處處風雨均調春麥秋禾並登豐稔雖邊遠荒僻之地亦慶有秋惟直隸湖廣安徽數州縣近水最低之處常年被潦者畧有侵注亦不爲災是今歲可稱大有年矣朕感

上天之垂慈慶下民之受福而推求其故良由今年各省初耕藉田各該有司自然小心敬慎齋戒虔誠是以感格上蒼而獲此盈寧之錫倘從此益加敬謹不懈初心則歲歲屢豐可以預必爾督撫等可通行曉諭所屬官民當凜帝鑒之匪遙勿視耕田爲故事永矢敬恪以迓

天和天下臣民受福斯朕之福也思之慎之毋忽朕言

雍正七年

諭重農

自古帝王致治誠民莫不以重農爲首務書陳無逸先知稼穡之艱難詩載豳風備敘田家之力作論語云百姓足君孰與不足孟子云民事不可緩也蓋國以民爲本民以食爲天農事者帝王所以承天養人久安長治之本也我國家撫綏寰宇

聖祖仁皇帝臨御六十餘年深仁厚澤休養生息戶口日增生齒益繁而直省之內地不加廣近年以來各省皆有

收成其被水歉收者不過州縣數處耳而米價遂各覺漸貴閩廣之間頗有不敷之慮望濟於鄰省良由地土之所產如舊而民間之食指愈多所入不足以供所出是以米少而價昂此亦理勢之必然者也夫米穀爲養命之寶旣賴之以生則當加意愛惜而不可存輕棄之心且資之者衆尤當隨時撙節而不可縱口腹之欲每人能省一勺在我不覺其少而積少成多便可多養數人若人人如此則所積豈不更多所養豈不更衆乎養生家以食少爲要訣固所以頤神養和亦所以節用惜福也況脾主於信習慣便成自然每見食少之人其精

神氣體未嘗不壯此顯而可見者至於各省地土其不可以種植五穀之處則不妨種他物以取利其可以種植五穀之處則當視之如寶勤加墾治樹藝菽粟安可舍本而逐末棄膏腴之沃壤而變爲果木之場廢饗餐之恒產以倖圖贏餘之利乎至於煙葉一種於生人日用毫無裨益而種植必擇肥饒善地尤爲妨農之甚者也小民較量錙銖且但顧目前而不爲久遠之計故當圖利之時若令其舍多取寡棄重就輕必非其情之所願而地方官遽然繩之以法則勢有所難行轉滋紛擾惟在良有司懃懃懇懇諄切勸諭俾小民豁然醒悟知

稼穡爲身命之所關非此不能生活而其他皆不足恃則羣情踴躍不待督課而皆盡力於南畝矣朕聞江南江西湖廣粵東數省有一歲再熟之稻風俗如此而仍至於乏食者是地土之力有餘而播植之功不足豈非小民習於怠惰而有司化導者有未至耶或者曰米穀太多則價賤而難於糶賣昔人有穀賤傷農之說諺語所謂熟荒者此則不必過慮假若小民勤於耕作收穫豐盈至價賤而難於出糶朕必多發官價以糶買之使重農務本之良民獲利而有餘貲也朕生平愛惜米穀每食之時雖顆粒不肯拋棄以朕玉食萬方豈慮天庾之不給而所以如此撙節愛惜者實出於天性自然之敬慎並不由於勉強且以米穀乃

上天所賜以生養萬民者朕爲天下生民主惟有敬慎寶重仰冀

天心默佑雨暘時若歲獲有秋俾小民家有蓋藏人歌樂土朕旣爲億萬生民計不敢輕忽

天貺爾等紳衿百姓獨不自爲一身一家之計乎朝夕生養之需旣受

上天之賜若果加意愛惜隨時撙節則天必頻頻賜賚長享盈寧之福若恣情縱欲暴殄天物則必上干天怒不蒙

賜賚而水害災禱之事皆所不免其理豈或爽哉又聞  
江西廣西地方竟有以米穀飼養豚豕者試思穀食之  
與肉食孰重孰輕孰急孰緩而乃以

上天之所賜小民終歲勤苦之所獲者爲豢養物類之用豈  
不干天和而輕民命乎朕所以惓惓訓諭者惟期天下  
之人專務本業以杜浮靡愛惜物力以圖久遠共體朕  
敬迓

天庥勤恤民隱之意則爾等家室必益至於豐饒爾等子孫  
必永綿其福澤思之思之母忽朕言着將此曉諭內外  
官民人等並通行遠鄉僻壤咸使聞知特諭

欽定訓飭州縣規條論

牧令爲親民之官一人之賢否關係萬姓之休戚故自  
古帝王慎重其選而朕之廣攬旁求訓勉告誡冀其奏  
循良之績以惠我烝黎者亦備極苦心矣惟是地方事  
務皆發端於州縣頭緒紛繁情偽百出而膺斯任者類  
皆初登仕籍之人未練習於平時而欲措施於一旦無  
怪乎徬徨瞻顧心志茫然卽採訪咨詢而告之者未必  
其盡言無隱此古人所以有學製美錦之歎也向以大  
學士朱軾左都御史沈近思外任多年周知地方利弊  
雍正二年曾令二臣商著規則以爲州縣之南車乃書

未就緒而沈近思物故邇年以來朱軾復時多病此事遂至遲延去年始降旨委諸總督田文鏡李衛今二臣各抒所見繕錄諸條以進朕親加披覽見其條理詳明言詞剴切民情吏習罔不兼該大綱細目莫不備舉誠新進之津梁庶官之模範也在二臣各就其所閱歷者而言繁簡同異之間不必一致而慎守官方勤恤民隱興利除害易俗移風其大指則一而已矣爰就本文付之剴劂頒賜州縣官各一帙俾置之几案間朝夕觀覽省察提撕治效未臻必思所以勉之弊端未革必思所以去之本之以實心行之以實力毋始勤而終怠毋靜言而庸違如此則不但國家得司牧之賢草野有父母之頌而爾等身膺顯擢叨被榮光福貽子孫名標史冊豈不美歟特諭

諭盛京刑部

朕聞得奉天地方凡事關旗民者俱送交盛京刑部會審雖司員會同有司承審實皆司員主稿乃奉天司員積成陋習惟事威嚴一切人犯到案先將鎖鍊盤于地上令其膝跪謂之跪鎖繼以荆條互擊其背任意敲打謂之背花鞭又案無定限如上年八月間遼陽州民郭金美毆死旗人裴玉亨一案白晝毆傷更餘殞命當日

旗員及知州會驗任聽屍親串同伴作混報多傷且傷痕寬長逾格承審司員不卽稟駁亦不揆度情理惟執定傷痕刑夾供認草率定擬本年閏四月內葛森到任始駁令另行驗審相距已十月餘尚未定案又筆帖式皆本處生長之人所司者不過翻譯之事乃當審訊之時輒以列坐詰問等語此皆朕訪聞甚確者國家定例訊鞫人犯必須審問實情其應用刑訊者自有一定規條今奉天司員承審人犯一經到案不察虛實便以刑罰相加且於定例之外創爲跪鎖等項此從來所未聞者似此嚴刑重罰其中豈無冤濫至于筆帖式微員職

司翻譯並無審刑之責乃公然列坐審詰命案有乖體制以上二事着嚴行禁止倘再蹈從前陋習經朕察出定將該堂官及司員等一併嚴加議處至辦理事件自有限期而人命等案關係尤重若無定限則拖累牽連之弊不可勝數嗣後應如何定以限期俾得永遠遵行之處着盛京刑部侍郎會同該將軍悉心定議具奏

雍正十三年十月二十日

上諭

古之葬者厚衣之以薪葬於中野後世聖人易之以菆椰所以通變宜民而達其仁孝之心也本朝肇迹關東



以師兵爲營衛遷徙無常遇父母之喪棄之不忍攜之不能故用火化以便隨身捧持聊以遂其不忍相離之願非得已也自定鼎以來八旗蒙古各有寧居祖宗墟墓悉隸鄉土喪葬可依古以盡禮而流俗不察或仍用火化此狃于沿習之舊而不思當年所以不得已而出此之故也朕思人子事親送死最爲大事豈可不因時定制而痛自猛省乎嗣後遠鄉貧人不能扶柩回里不得已攜骨歸葬者姑聽不禁外其餘一槩不許火化倘有犯者按律治罪族長及佐領等隱匿不報一并處分朕又聞漢人多惑於堪輿之說購求風水以致累年停柩漸至子孫貧乏數世不得舉葬愚悖之風至此爲極嗣後守土之官必多方勸導俾得按期葬埋以妥幽靈以盡子職此厚人倫美風俗之要務也各凜遵毋忽欽此

雍正十三年十月初七日

上諭

洪範庶徵凡雨暘之愆和關人事之得失所以著感應之理使修人事然水旱之災雖堯湯不能免惟有勤恤民隱竭力補救可以化災沴而成太和總在積至誠以昭假不可萌一念之欺罔也督撫身任封疆重寄奏報

收成分數乃關係地方民命必確實無欺始得議行蠲賑以甦民困朕平日留心此事見各省陳報收成分數或有只據一方豐收數目爲定雨水過多之處以高阜所收爲準亢旱時有之年以低下所獲爲準並不分晰某處豐收某處歉獲其意祇圖粉飾以邀感召和氣之名而不知卽此一念欺罔已爲獲罪於民獲罪於君而獲罪於

天矣夫至誠格

天乃聖人體信達順參贊化育之事爾等督撫卽使辦理妥協亦不遜仰承

皇考聖訓遵循罔越豈得因年歲之豐阜貪

天之功爲已功乎若歲豐可引爲已功則必歲歉懼爲已罪捏報豐收不恤民艱使饑凍流亾之慘不得上聞蠲免賑恤之恩不得下逮職思其故誰爲厲階清夜捫心何以自問且朕體

皇考敬

天勤民之意膺君國子民之任豈肯姑貸此等督撫以爲民害耶嗣後務各警醒所奏報各地方收穫分數不得絲毫假飾以干重戾特諭

雍正十三年十一月二十九日

上諭

奉天

陵寢每年祭祀典禮關係重大向例止遣侍郎行禮朕思世澤雖遠祖孫一脉相承必子姓虔奉明禋而後精誠可格嗣後當於宗室中派公三人前往行祭祀禮其應卽在奉天居住或應每年輪班派往之處著總理事務王大臣會同五旗王公等定議具奏

序

御製大清律序

順治三年

朕惟

太祖

太宗創業東方民淳法簡大辟之外惟有鞭笞朕仰荷

天庥撫臨中夏人民旣衆情偽多端每遇奏讞輕重出入頗煩擬議律例未定有司無所稟承爰勅法司官廣集廷議詳譯明律參以國制增損劑量期於平允書成奏進朕再三覆閱仍命內院諸臣校訂妥確乃允刊布名曰大清律集解附例爾內外有司官吏敬此成憲勿得任意低昂務使百官萬民畏名義而重犯法冀幾刑措之風以昭我

祖宗好生之德子孫臣民其世世守之

御製人臣儆心錄序

順治十二年

朕惟人臣立身制行本諸一心心正則爲忠爲直衆美集焉不正則爲姦爲慝羣惡歸焉是放心者萬事之本美惡之所由出也顧事有殊塗心惟一致一於國則忘其家一於君則忘其身如此者不特名顯身榮邦家亦允賴之矣若夫姦邪之流樹黨營私怙權亂政卒至身名俱喪爲國厲階蓋緣居恒無正心之功一當勢利遂昏迷瞽亂狂肆驕矜上昧王章下垂臣誼或作威而聯羽翼或比匪而效奔趨如譚泰石漢以累世舊臣久叨恩遇不思圖報逞臆橫行跋扈自恣目無綱紀陳名夏

則一介豎儒驟蒙顯拔倚任深重賜賚優隆而乃背德植交蔑法罔上此皆自作罪孽以致隕厥身家朕歷稽往古宵人誤國代代有之觀諸近事復爛鑿昭然足爲永戒恐後之爲臣者或仍蹈覆轍負主恩而渝素志至於身罹刑憲悔悼無由故推原情狀而論列之錄成一編以爲人臣儆心之訓云

聖諭廣訓序

雍正二年

書曰每歲孟春道人以木鐸徇於路記曰司徒修六禮以節民性明七教以興民德此皆以敦本崇實之道爲牖民覺世之模法莫良焉意莫厚焉我

聖祖仁皇帝久道化成德洋恩普仁育萬物義正萬民六十年來宵衣旰食祇期薄海內外興仁講讓革薄從忠共成親遜之風永享昇平之治故

特頒上諭十六條曉諭八旗及直省兵民人等自綱常名教之際以至於耕桑作息之間本末精粗公私鉅細凡民情之所習皆

睿慮之所周視爾編氓誠如赤子

聖有謨訓明徵定保萬世守之莫能易也朕續承大統臨御兆人以

聖祖之心爲心以

聖祖之政爲政夙夜黽勉率由舊章惟恐小民遵信奉行久而或怠用申誥誠以示提撕謹將

上諭十六條尋繹其義推行其文共得萬言名曰

聖諭廣訓旁徵遠引往復周詳意取顯明語多直樸無非奉先志以啟後人使羣黎百姓家喻而戶曉也願爾兵民等仰體

聖祖正德厚生之至意勿視爲條教號令之虛文共勉爲謹身節用之庶人盡除夫浮薄囂凌之陋習則風俗醇厚家室和平在朝廷德化樂觀其成爾後嗣子孫並受其福積善之家必有餘慶其理豈或爽哉

記

御製創興盛京海運記

康熙三十六年

傳曰補乏薦饑道也朕孜孜圖治冀臻上理一夫不獲若納諸隍是以平時謹財用慶委積一遇凶荒則蠲租已責之外開廩發賑設糜平糴靡政弗舉惟是東北地勢曠莽陸輓維艱遼左暨朔漠諸部尤屬險遠計惟航海轉粟事簡功倍規畫於中者非一日矣癸酉冬盛京穀不登民艱於食乃發山東濱海郡縣常平倉米二萬石由登州運至三岔河海運之役自茲始明年二月親幸天津訪海道自大沽口達三岔較便三月命部員董

厥事截留山東漕米二萬石用商船三十連檣出津門海若效順三晝夜卽抵三岔因建倉遼陽開化城諸處儲峙之又分舟運至盛京米價頓減饑困以蘇朕念盛京根本重地積貯多則民食永足乃於丙子春復截留山東漕米五萬石運至三岔河如故其秋諭截留次年漕米六萬石遣部臣偕督撫造新船二十加運二萬石既又諭增造船十來歲可運至十二萬石猶慮運船少也明年春諭福建將軍督撫勸導商船泛海貿易至則給以運直所齎貨物止徵正稅一時商賈靡不踴躍趨事海舶大集於是截留河南山東漕米共二十萬石用

天津浙閩船前後轉運以達盛京者共數十萬有奇適  
烏喇告饑遂以所運粟分輸易屯河士卒數萬咸賴生  
全而是時大兵方進剿逆寇噶爾丹需糧孔亟用以頒  
給軍儲不匱其年冬盛京

陵寢各屬兵民及科爾沁諸屬國窮戶人等咸以疾苦聞復  
發盛京存貯米賑之其所濟之遠如此因命來歲仍自  
大沽故道用天津船運山東河南漕米六萬石以備軍  
民之需而商船至是亦弗用矣是役也輓數十萬之粟  
經數千里之遙帆檣一集倉庾俱滿無踰關度嶺之勞  
絕車載牛牽之苦波委水輪禾困自轉賑陪京而入民

胥樂給軍精而庚癸不呼內以撫綏藩部外以摧滅強  
寇皆由肇舉海運一法斷自朕衷屢試而效故自侯甸  
以至要荒均受其賜夫舉一事而有濟於一方者古人  
尚不敢忘況若茲之費省利大功神惠博使不載其始  
末垂示簡冊將良法美意久而漸失後何所考用是援  
筆而紀其實云

御製海運賑濟朝鮮記

康熙三十七年

朕聞救災拯患王政所亟是以夙夜求莫雖在遐荒絕  
域猶若恫瘝乃身矧屬在藩維苟有疾苦何忍一日置  
也康熙三十六年冬朝鮮國王李焞奏比歲薦饑廩庾

告匱公私困窮八路流殍相續於道籲懇中江開市買穀以甦溝瘠俾無殄國祀朕深爲惻然立允其請遂於明年二月命部臣往天津截留河南漕米用商船出大沽海口至山東登州更用鷄頭船撥運引路又頒發帑金廣給運直緩徵鹽課以鼓勵商人將盛京所存海運米平價貿易其水陸運米四萬石加賚者一萬石朝鮮舉國臣庶方藜藿不飽獲此太倉玉粒如坻如京人賜之食莫不怵舞忻悅凋瘵盡起該王具表陳謝感激殊恩備言民命續於旣絕邦祚延於垂亡蓋轉運之速賑貸之周亦古所未有也朕念朝鮮自

皇祖撫定以來奠其社稷綏其疆宇俾世守東藩奉職修貢恩至渥矣茲者告饑不憚轉輸數千里之勞不惜糜費數萬石之粟環國土而戶給之非獨拯災拯患遠邁春秋汎舟之義實所以普澤藩封而光昭

先德也是烏可以無記



出長城以飛

城凡此之為費以普

濟而亦之果與國土

而可餘之非誠與

盛京通志卷之二

